

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренијски савјет

Rješenje

Prijava koncentracije privrednog subjekta

„Nectar“ d.o.o. Bačka Palanka, Republika Srbija

Sarajevo,
oktobar 2011. godine



Broj: 04-26-1-017-11 -II/11
Sarajevo, 12. oktobar 2011. godine

Na osnovu člana 25. stav (1) tačka e), člana 42. tačka d), u vezi s čl. 12., 14., 16., 17. i 18. Zakona o konkurenciji („Službeni glasnik BiH“, br. 48/05, 76/07 i 80/09), a rješavajući po Prijavi koncentracije privrednog subjekta Fabrika za preradu voća i povrća „Nectar“ d.o.o. Bačka Palanka, Novosadski put broj 9, 21 400 Bačka Palanka Republika Srbija, zastupan po advokatu iz Sarajeva, Nedžidi Salihović, Fra Anđela Zvizdića br. 1, 71 000 Sarajevo, zaprimljenoj dana 9. augusta 2011. godine pod brojem: 04-26-1-017-II/11, Konkurencijsko vijeće, na 19. (devetnaestoj) sjednici održanoj dana 10. oktobra 2011. godine, donijelo je

R J E Š E N J E

- (1) Ocjenjuje se dopuštenom koncentracija na tržištu prodaje sokova od voća i povrća u Bosni i Hercegovini, koja će nastati sticanjem kontrole privrednog subjekta Fabrike za preradu voća i povrća „Nectar“ d.o.o. Bačka Palanka, Novosadski put broj 9, 21400 Bačka Palanka Republika Srbija, nad privrednim subjektom „Fructal“ Živilska industrija d.d. Ajdovščina, Tovarniška cesta 7, 5270 Ajdovščina, Republika Slovenija, kupovinom većine dionica.
- (2) Ovo Rješenje o koncentraciji se upisuje u Registar koncentracija.
- (3) Ovo Rješenje je konačno i bit će objavljeno u „Službenom glasniku BiH“, službenim glasilima entiteta i Brčko distrikta Bosne i Hercegovine.

O b r a z l o ž e n j e

Konkurencijsko vijeće je dana 9.8.2011. godine pod brojem: 04-26-1-017-II/11 zaprimilo Prijavu koncentracije (u daljem tekstu: Prijava), podnesenu od strane privrednog subjekta Fabrike za preradu voća i povrća „Nectar“ d.o.o. Bačka Palanka, Novosadski put broj 9, 21 400 Bačka Palanka Republika Srbija, kojeg zastupa Nedžida Salihović, Fra Anđela Zvizdića br. 1, 71 000 Sarajevo (u daljem tekstu: Podnosilac prijave ili „Nectar“), kojom privredni subjekt „Nectar“ namjerava da stekne kontrolu nad privrednim subjektom „Fructal“ Živilska industrija d.d. Ajdovščina, Tovarniška cesta 7, 5 270 Ajdovščina, Republika Slovenija (u daljem tekstu: „Fructal“), kupovinom većine dionica.

Uvidom u podnesenu Prijavu, Konkurencijsko vijeće je utvrdilo da ista nije potpuna, u smislu člana 30. stav (1) Zakona o konkurenciji (u daljem tekstu: Zakon) i čl. 9. i 11. Odluke o načinu podnošenja prijave i kriterijima za ocjenu koncentracije privrednih subjekta („Službeni glasnik BiH“, broj 34/10), te je zatražilo dopunu iste, u skladu sa članom 31. Zakona (akt broj: 04-26-1-017-1-II/11 od 16.8.2011. godine i akt broj: 04-26-1-017-5-II/11 od 19.9.2011. godine).

Podnosilac prijave je u skladu sa zahtjevom Konkurencijskog vijeća dopunio Prijavu traženom dokumentacijom (podnesak broj: 04-26-1-017-2 -II/11 od 23.8.2011. godine, podnesak broj: 04-26-1-017-4-II/11 od 7.9.2011. godine i podnesak broj: 04-26-1-017-8-II/11 od 27.9.2011. godine).

Po prijemu tražene dokumentacije Konkurencijsko vijeće je utvrdilo da je Prijava kompletna, te izdalo Potvrdu o prijemu kompletne i uredne Prijave, u skladu sa članom 30. stav (3) Zakona, dana 28.9.2011. godine pod brojem: 04-26-1-17-9-II/11.

Podnosilac prijave je naveo, u smislu člana 30. stav (2) Zakona da će zahtjev za ocjenu koncentracije podnijeti nadležnim tijelima za konkurenciju Republike Slovenije, Republike Srbije, Crne Gore i BJR Makedonije.

Komisija za zaštitu konkurencije Republike Srbije je koncentraciju odobrila, u skraćenom postupku, rješenjem broj: 6/0-02-627/2011-3 od 5.9.2011. godine.

Konkurencijsko vijeće je dana 28.9.2011. godine, u skladu sa članom 16. stav (4) Zakona, izdalo Obavijest o dostavljenoj Prijavi (akt broj: 04-26-1-17-6-II/11 od 26.9.2011. godine) u dnevnoj štampi Bosne i Hercegovine, u kojoj je objavilo podatke o namjeravanoj koncentraciji, te pozvalo sve direktno zainteresovane strane na dostavljanje pisanih komentara u pogledu provedbe iste. Na predmetnu Obavijest nisu dostavljeni komentari zainteresovanih strana.

Konkurencijsko vijeće u postupku ocjene dopuštenosti koncentracije je utvrdilo slijedeće činjenice:

Predmetna Prijava je podnesena blagovremeno, u skladu sa članom 16. stav (1) Zakona.

1. Učesnici koncentracije

Učesnici predmetne koncentracije su privredni subjekti Fabrika za preradu voća i povrća, „Nectar“ d.o.o. Bačka Palanka, Novosadski put 9, 21 400 Bačka Palanka, Republika Srbija i „Fructal“ Živilska Industrija d.d. Ajdovščina, Tovarniška cesta 7, 5 270 Ajdovščina, Republika Slovenija.

1.1.Privredni subjekt Nectar

Fabrika za preradu voća i povrća „Nectar“ d.o.o. Bačka Palanka, Novosadski put 9, 21400 Bačka Palanka, Republika Srbija, upisana je u registar Agencije za privredne registre Republike Srbije, pod registarskim brojem 76995 i matičnim brojem 08666032, dana 19. januara 1998. godine.

Pretežna registrovana djelatnost privrednog subjekta „Nectar“ je proizvodnja sokova od voća i povrća.

Privredni subjekt „Nectar“ je u vlasništvu privrednog subjekta Radun Inženjering d.o.o. Bačka Palanka, matični broj 08648581, Željeznička 11, 21 400 Bačka Palanka,

Republika Srbija, sa 81,11% vlasničkog udjela i fizičkog lica Smilje Radun iz Novog Sada, JMB: (..)**¹, Kisačka 37, Republika Srbija sa 18,89% vlasničkog udjela.

Podnosilac prijave nema registrovano društvo niti predstavništvo u Bosni i Hercegovini, te prodaju i distribuciju vlastitih proizvoda vrši putem ovlaštenog kupca, privrednog subjekta (..)**², sa kojim je u 2010. godini zaključio Ugovor o kupoprodaji na godinu dana.

Prema podacima iz Prijave, privredni subjekt „Nectar“ nema 10% ili više udjela u osnovnom kapitalu, odnosno 10% ili više prava glasa u drugim privrednim subjektima u Bosni i Hercegovini.

1.2.Privredni subjekt Fructal

Privredni subjekt, „Fructal“ Živilinska industrija d.d. Ajdovščina, Tovarniška cesta 7, 5 270 Ajdovščina, Republika Slovenija, upisan je u registar Agencije za javnopravnu evidenciju i usluge Republike Slovenije pod matičnim brojem 5048664000, dana 29.6.1989. godine.

Pretežna registrovana djelatnost privrednog subjekta, „Fructal“ je proizvodnja sokova od voća i povrća.

Većinski vlasnik privrednog subjekta, „Fructal“ je privredni subjekt „Pivovarna union“ d.d. Ljubljana, Pivovarniška ulica 2, 1000 Ljubljana, Republika Slovenija sa vlasničkim udjelom od 93,7% ukupnog broja emitovanih dionica, dok je ostatak dionica u iznosu od 6,3% u vlasništvu malih dioničara.

Privredni subjekt „Pivovarna union“ d.d. Ljubljana, Pivovarniška ulica 2, Ljubljana, Republika Slovenija, upisan je u registar Agencije za javnopravnu evidenciju i usluge Republike Slovenije pod matičnim brojem 5048591000, dana 23.9.1991. godine.

Privredni subjekt, „Fructal“, je u 2010. godini posjedovao 100,0% vlasništva u privrednom subjektu „Eurofruit“ d.o.o. Sarajevo, ul. Hifzi Bjelavca br. 2, 71 000 Sarajevo, upisan u registarskom ulošku broj 1-18974, Općinskog suda u Sarajevu. Navedeni privredni subjekt, kao i njegova filijala Banja Luka, ul. Put srpskih branilaca 25-27, 78 000 Banja Luka, upisana u registarski uložak broj 1-1897401 Okružnog suda u Banja Luci, rješenjem Općinskog suda u Sarajevu broj: 065-0-Reg-10-003417 od 17.2.2011. godine izbrisan je iz evidencije privrednih subjekta, nakon što je zaključen postupak likvidacije nad istim.

Privredni subjekt „Fructal“ u Bosni i Hercegovini posjeduje 17,32% vlasničkog udjela u privrednom subjektu „Laško grupa“ d.o.o. Sarajevo, ul. Hifzi Bjelavca broj 1, 71 210 Ilidža, Bosna i Hercegovina.

Promet i prodaju svojih proizvoda u Bosni i Hercegovini privredni subjekt „Fructal“ vrši putem pet distributera i to: privredni subjekt „(..)**² Banja Luka, privredni subjekt

¹ (..)** podaci predstavljaju poslovnu tajnu

(..)** Kakanj, privredni subjekt (..)**Grude, privredni subjekt (..)** Živinice i privredni subjekt (..)** Široki Brijeg, te je na taj način prisutan prodajom svojih proizvoda na cijeloj teritoriji Bosne i Hercegovine.

2. Obaveza prijave predmetne koncentracije

Obaveza prijave koncentracije privrednih subjekata sa sjedištem i prebivalištem u inostranstvu postoji ukoliko su ispunjeni uslovi iz člana 14. stav (1) tačke a) i b) Zakona, tj. ukoliko ukupni godišnji prohod svih učesnika koncentracije ostvaren prodajom roba i/ili usluga na svjetskom tržištu iznosi 100.000.000,00 KM po završnom računu u godini koja je prethodila koncentraciji i ukoliko ukupni godišnji prihodi svakog od najmanje dva privredna subjekata učesnika koncentracije ostvaren prodajom roba i / ili usluga na tržištu Bosne i Hercegovine iznosi najmanje 8.000.000,00 KM po završnom računu u godini koja je prethodila koncentraciji, ili ako je njihov zajednički udio na relevantnom tržištu veći od 40,0%.

Ukupni godišnji prihodi privrednih subjekata učesnika predmetne koncentracije, na dan 31.decembar 2010. godine, iznose:

Tabela 1.

R. b.	Privredni subjekt	Bosna i Hercegovina	Svijet
1.	„Nectar“	(..)** KM	(..)** KM
2.	„Fructal“	(..)** KM	(..)** KM

Izvor: Podaci iz Prijave

Godišnji prihodi učesnika koncentracije (Tabela 1.) predstavljaju ukupne prihode (bez poreza na dodanu vrijednost i drugih poreza koji se direktno odnose na učesnike koncentracije na tržištu Bosne i Hercegovine), u smislu člana 9. tačka h) Odluke o načinu podnošenja prijave i kriterijima za ocjenu koncentracija privrednih subjekata.

Na osnovu navedenih podataka o ukupnom godišnjem prihodu, u smislu člana 14. stav (1) tačke a) i b) Zakona, utvrđeno je da su učesnici koncentracije obavezni podnijeti Prijavu.

Također, Konkurencijsko vijeće je utvrdilo da se radi o eksteritorijalnoj koncentraciji obzirom da, ista, ima uticaj na tržište Bosne i Hercegovine, isključivo preko prodaje roba, učesnika koncentracije na navedenom tržištu, te da su učesnici koncentracije bili obavezni prijaviti koncentraciju, u smislu člana 2. stava (3) Zakona.

3. Pravni okvir ocjene koncentracije

Konkurencijsko vijeće je u provođenju postupka ocjene dopuštenosti predmetne koncentracije primijenilo odredbe Zakona, Odluke o utvrđivanju relevantnog tržišta („Službeni glasnik BiH“, br. 18/06 i 34/10), Odluke o definiranju kategorija dominantnog položaja („Službeni glasnik BiH“, br. 18/06 i 34/10), te Odluke o načinu donošenja prijave i kriterijima za ocjenu koncentracije privrednih subjekata.

4. Pravni osnov i oblik predmetne koncentracije

Privredni subjekt „Nectar“ i privredni subjekt „Pivovarna union“, d.d. Ljubljana, Pivovarniška ulica 2, 1000 Ljubljana, Republika Slovenija su zaključili Ugovor o kupoprodaji dana 25.7.2011. godine (u daljem tekstu: Ugovor).

Predmet ugovora je kupoprodaja (..)**, od ukupno (..)** slobodno prenosivih registrovanih dionica, privrednog subjekta „Fructal“, što čini 93,7% ukupnog broja emitovanih dionica.

Preostalih 6,3% dionica će nakon provođena koncentracije ostati u vlasništvu malih dioničara. Podnosilac prijave je, u skladu sa relevantnim zakonodavstvom Republike Slovenije, dužan da podnese obaveznu ponudu za preuzimanje preostalih dionica, te postoji mogućnost da stekne svih 100% dionica privrednog subjekta „Fructal“.

Konkurencijsko vijeće je prihvatilo Ugovor, kao pravni osnov predmetne koncentracije, u smislu člana 16. stav (1) Zakona, a u vezi sa članom 30. stav (1) tačka a) Zakona i članom 9. tačka f) alineja 6. Odluke o načinu podnošenja prijave i kriterijima za ocjenu koncentracije privrednih subjekta.

U skladu sa naprijed navedenim, a na osnovu člana 12. stav (1) tačka b) pod 1) Zakona, pravni oblik koncentracije jeste sticanje kontrole jednog privrednog subjekta nad drugim privrednim subjektom kupovinom većine dionica.

5. Relevantno tržište predmetne koncentracije

Relevantno tržište koncentracije, u smislu člana 3. Zakona, te čl. 4. i 5. Odluke o utvrđivanju relevantnog tržišta, čine tržište određenih proizvoda/usluga koje su predmet obavljanja djelatnosti na određenom geografskom tržištu.

Prema odredbi člana 4. Odluke o utvrđivanju relevantnog tržišta, relevantno tržište proizvoda obuhvaća sve proizvode i/ili usluge koje potrošači i/ili korisnici smatraju međusobno zamjenjivim, pod prihvatljivim uslovima, imajući u vidu naročito njihove bitne karakteristike, kvalitet, uobičajenu namjenu, način upotrebe, uslove prodaje i cijene.

Nadalje, prema članu 5. Odluke o utvrđivanju relevantnog tržišta, relevantno tržište u geografskom smislu obuhvaća cjelokupan ili značajan dio teritorija Bosne i Hercegovine na kojem privredni subjekt djeluje u prodaji i/ili kupovini relevantnog proizvoda pod jednakim ili dovoljno ujednačenim uslovima i koji to tržište bitno razlikuje od uslova tržišne konkurencije na susjednim geografskim tržištima.

Relevantno tržište proizvoda i/ili usluga u konkretnom slučaju, predstavlja prodaja sokova od voća i povrća kao pretežna djelatnost učesnika koncentracije na cijeloj teritoriji Bosne i Hercegovine.

Slijedom navedenog, pod relevantnim tržištem predmetne koncentracije smatra se tržište prodaje sokova od voća i povrća na teritoriji Bosne i Hercegovine.

6. Analiza relevantnog tržišta

Tržišni udjeli učesnika koncentracije i njihovih konkurenata na relevantnom tržištu u 2010. godini, su:

Tabela 2.

R.b.	Naziv privrednog subjekta	Tržišni udio(%)
1.	„Fructal“ Živilinska industrija d.d. Ajdovščina, Republika Slovenija	(..)**
2.	„Jamnica“ d.d. Zagreb, Republika Hrvatska	(..)**
3.	„Nectar“ d.o. Bačka Palanka, Republika Srbija	(..)**
4.	„Coca Cola Beverages BH“ d.o.o. Sarajevo, Bosna i Hercegovina	(..)**
5.	„Vino Župa“ d.d. Aleksandrovac, Republika Srbija	(..)**
6.	„Vitaminka“ a.d. Banja Luka, Bosna i Hercegovina	(..)**
7.	„Vegafruit“ d.o.o. Doboj Istok, Bosna i Hercegovina	(..)**
8.	„Rauch Fruchtsäfte GmbH“ Rankweil, Austrija	(..)**
9.	„Vindija“ d.d. Varaždin, Republika Hrvatska	(..)**
10.	„Milkos“ d.d. Sarajevo, Bosna i Hercegovina	(..)**
11.	„Bony“ d.o.o. Tuzla, Bosna i Hercegovina	(..)**
12.	„Pivovarna union“ Ljubljana, Republika Slovenija	(..)**
13.	„Hercegovinavino“ d.o.o. Mostar, Bosna i Hercegovina	(..)**
14.	„Laberion“ Podujeva, Kosovo	(..)**
15.	„Vitinka“ a.d. Kozluk, Bosna i Hercegovina	(..)**
16.	„IB TEAM“ d.o.o. Krnješevci, Republika Srbija	(..)**
17.	„Pago“ d.o.o. Zagreb, Republika Hrvatska	(..)**
18.	„Sarajevska pivara“ d.d. Sarajevo	(..)**
19.	Ostali	(..)**
	Ukupno	100
	UKUPNO UČESNICI KONCENTRACIJE (1+3)	(..)**

Izvor: Podaci iz Prijave

Prema podacima (Tabela 2.), ukupan tržišni udio učesnika koncentracije na relevantnom tržištu prodaje sokova od voća i povrća u Bosni i Hercegovini iznosi (..)**%.

Pored učesnika koncentracije na relevantnom tržištu su prisutni i drugi privredni subjekti sa većim tržišnim udjelima kao što su privredni subjekti „Jamnica“ d.d. Zagreb, Republika Hrvatska sa (..)**%, „Coca Cola Beverages BH“ d.o.o. Sarajevo, Bosna i Hercegovina sa (..)**%, „Vino Župa“ d.d. Aleksandrovac, Republika Srbija sa (..)**%, te „Vitaminka“ a.d. Banja Luka, Bosna i Hercegovina sa (..)**% tržišnog udjela.

7. Ocjena predmetne koncentracije

Konkurencijsko vijeće je, analizom relevantnih podataka u smislu člana 17. Zakona, ocijenilo da će se provođenjem predmetne koncentracije povećati tržišni udio Podnosioca prijave na relevantnom tržištu prodaje sokova od voća i povrća u Bosni i Hercegovini (Tabela 2.), ali da neće doći do stvaranja i jačanja dominantnog položaja.

Konkurencijsko vijeće je u postupku donošenja Rješenja utvrdilo da na relevantnom tržištu djeluje veći broj privrednih subjekta koji se bave prodajom sokova od voća i povrća.

Također, Konkurencijsko vijeće je uzelo u obzir i planove Podnosioca prijave, u smislu uvođenja inovacija u vidu novih proizvoda i novih tehnoloških procesa, što bi na dugoročnom planu moglo imati pozitivne efekte za krajnje potrošače na relevantnom tržištu.

Slijedom navedenog, Konkurencijsko vijeće je ocijenilo dopuštenom predmetnu koncentraciju u smislu člana 18. stav (2) tačka a) Zakona, kao u dispozitivu.

8. Administrativna taksa

Podnosilac prijave na ovo Rješenje, u skladu sa članom 2. tarifni broj 107, stav (1) tačka d) pod 1) Odluke o administrativnim taksama u vezi sa procesnim radnjama pred Konkurencijskim vijećem („Službeni glasnik BiH“, br. 30/06 i 18/11) je dužan platiti administrativnu taksu u ukupnom iznosu od 2.500,00 KM u korist Budžeta institucija Bosne i Hercegovine.

9. Pouka o pravnom lijeku

Protiv ovog Rješenja nije dozvoljena žalba.

Nezadovoljna stranka može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objave ovog Rješenja.

Predsjednik

Ibrica Lakišić